

Օրէնքները պահելու և հրատարակելու մասին. — Ի փոփոխումն, լրացումն և վերացումն պատշաճաւոր օրէնքների՝ սահմանել:

1) Օրէնքների իսկականները պահւում են Հայաստանի խորհրդում: Օրէնքի իսկականը համարւում է նրա այն օրինակը, որը պարունակում է օրէնքի Հայաստանի խորհրդի կողմից հաստատւած վերջնական բնագիրը և վաւերացւած է խորհրդի նախագահի և աւագ քարտուղարի ստորագրութիւններով:

2) Հայաստանի խորհրդից հաստատւելոց յետոյ, օրէնքի պատճեն— օրինակները, վաւերացւած խորհրդի աւագ քարտուղարից, խորհրդի նախագահի կարգադրութեամբ ուղարկւում են «Օրէնքների Հաւաքածուում» տպագրելու և հրատարակելու:

3) «Օրէնքների Հաւաքածուի» տպագրութիւնն ու սրբագրութիւնը Հայաստանի խորհրդի նախագահի վերին հսկողութեամբ ղեկավարւում է նոյն խորհրդի Դիւանի պատշաճաւոր պաշտօնեան, որը նշանակւում է նախագահից: «Օրէնքների Հաւաքածուի» համարների առաքումը ըստ պատկանելոյն կառավարութեան պարտականութիւնն է:

(Հաստ. սեպտ. 24—ին 1918թ.)

Կարիք ունեցող գաղթականների խնամատարութեան մասին. — Յօդ. ա. Կարիք ունեցող գաղթականներին օգնութիւն է տրւում աշխատանքի միջոցով:

Ծանօթ. — ա. Գաղթականին աշխատանք տալու անհնարինութեան կամ նրա աշխատանքի անընդունակութեան դէպքում նա ստանում է նպաստ: Ծանօթ. — բ. Աշխատանքից հրաժարւող գաղթականը զրկւում է պետական նպաստ ստանալու իրաւունքից:

Յօդ. բ. Հայաստանի սահմաններում գտնւած պետական ազատ հողերը տրւում են գաղթականներին մշակելու:

Ծանօթ. — Նոյն նպատակով գաղթականներին են տրւում լքւած և անտէր հողեր:

Յօդ. գ. Գաղթական իւրաքանչիւր ընտանիքին հող տրւում է աշխատաւոր ձեռքերի թւի համեմատ:

Յօդ. դ. Ամենեւին հող չեն ստանում արհեստներով և առեւտրով զբաղւող, ինչպէս և հող ունեցող գաղթականները:

Յօդ. ե. Իւրաքանչիւր գոյք գաղթականին տրւում է մանրամասն ցուցակագրութեամբ. գոյքը փչացնելու համար գաղթականը ենթարկւում է օրինական պատասխանատւութեան:

Յօդ. զ. Հողից օգտւելու իրաւունք ստացած գաղթականը զրկւում է այլ իրաւունքից, եթէ նա մի ամսւայ ընթացքում չի գնում նշանակւած տեղը:

Յօդ. է. Գաղթականի ինքնութիւնը որոշւում է ընդհանուր հիմունքներով:

(Հաստ. սեպտ. 28—ին 1918թ.)

Կարիքաւոր գաղթականների համար ջուլիականոցներ բանալու մասին. — Յօդ. 1) Կարիքաւոր գաղթականների, առաւելապէս կանանց համար, բանալ պետական ջուլհականոցներ:

Յօդ. 2) Այդ նպատակով և համաձայն սրանց հետ հաստատւած նահաշլի յատկացնել՝ 6,691,200ր. և մոնոպոլիզացիայի ենթարկւած բամբակից 85,700 փութ: